

補續全蜀藝文志

全蜀補續秩文志卷之三十四

黃岡杜應芳

裁訂

景陵胡承詔

記

華陽縣學館記

宋張俞

三代之學繇秦廢蜀郡之學由漢興而天下之學由蜀起歷漢至宋殿室畫像古制盡在則蜀之學其盛遠矣哉始唐之衰侯王牯亂崩裂區宇盪削典法民擾厥命不盜則兵仁義禮樂於世何有惟孟氏踵有

蜀漢以文爲事凡草創制渡稽襲唐軌旣而紹漢廟
學遂勒石書九經又作都內三縣學館置師弟子講
習以儒遠人主師旣平蜀仍而不廢華陽縣學館者
僞廣政十二年作迄今一百餘載矣棟橈墻圯烏鼠
攸居新進晚生陋而不顧有弘農楊安之爲縣甚治
慨念隆學哀群士財因而新之事未克究得江東沈
扶來承其政益用儒雅要歸于道興學飾像嚴翼堂
宇上以遵 朝廷之制下以成楊君之故也惟華陽
理于州內而州故自有漢學前樂安蔣公旣已大之

今平陽文公率而教之濟濟洋洋禮樂流衍縣鄉之
學亦從而興上動下效風化柔靡可追古治可表後
式長世不墜惟賢是執宋慶曆四年楊君始脩之後
一年而沈君克成之又一年晉人張俞爲之記

金華書院記

元文禮愷

國家自延祐始設科悉革浮靡陋習專選經明行脩
之士故天下郡縣凡先哲著德立言有功於名教往
往卽其生長燕遊之地祠而奉之因卽其祠增館舍
貯經籍延師儒以講道尊前賢勵後學也唐拾遺陳

子昂先生梓之射洪人其讀書址在縣之金華其墓
在縣之獨坐其文翰議論在文冊天下學者至今景
慕如在目前至正改元冬監縣栢延建言請擇地創
拾遺書院又援墨池草堂眉山例請建山長員以職
教祀朝省是其言以祠宇未葺學田未置下有司經
度會栢延遷秩未果九年春周侯廷望來尹縣慨然
以爲已任巡行視縣治之西前界廟學之墻後枕金
華之麓有隙地焉承命爰殫規爲疏圖偶於瓦礫中
得仆碑雖漫其額題云建金華書院記侯驚且喜曰

方議相攸不圖前代已有其處且名副其實豈可復
易於是捐已俸鳩材穀募工匠親董厥役越明年秋
八月仍故基構正祠肆楹位先生像於中又明年春
二月構書樓門廡齋房若干楹旣而重得廡間官田
三百餘畝他日收其入以給廩餼而獨坐之祠昔封
靈祐文惠侯額賜英顯久爲風雨飄搖亦割俸集士
民新之迹其施設勤矣哉馳書求記欲刻之右禮愷
生也忝厠郡末不敢以菲陋辭竊惟古聖賢之言坦
明敷暢日星垂而江河流漢去古未遠體制二雅降

魏晉迄隋士各以纖文麗思雕蟲篆刻爲學問之極
致大雅絕響久矣唐興猶扇徐庾風獨于昂先生起
布衣奮然高蹈追媲六經與西漢並駕不幸嗣君幽
囚牝鷄鳴晨剪滅親賢斯時也羅織紛紜之獄起在
朝公卿方視爵祿爲鬼朴禁瘖惴惴保首領不暇而
先生以一秘書正字悼人之冤閔國之危以崇德緩
刑撫慰宗室引古證今反覆論諫又願興太學以教
胄子止擊羌之役以保全蜀凡有利害於天下知無
不言史臣稱其詞婉意切信乎其知言矣後之評史

者謂先生諫說武后狄公仁傑比或者譏其失言以
武后不可與之言遂謂事同而情異殊不究夫先生
所謂撫慰宗室者果何異乎其爲唐室謀深矣則先
生之心卽狄公之心也但狄公言之於武后衰老悟
悔之際其勢爲甚易所以成反正之功先生言之於
武后淫雪降熾之時其勢爲甚難非惟不見聽竟殞
於賊姦之手自古不可以成敗論人原其心可也惟
先生以忠厚之心惻怛之意陳救時諄切之言以正
太高明之學著雄渌雅健之文致杜子美韓退之繼

作咸推服爲先倡其有補於名教如此崇而祀之禮也雖然書院本爲作養人材而設而學者貴窮理以求踐履之實不啻爲利祿計今而後相與瞻仰先生之遺像心其心味其旨循進乎孔孟之門牆不負國家專選經明行脩之本意此則周侯之所望於來學而亦鄉人之所願也侯名鑄字廷望晉寧人歷官多善政觀於此舉槩可知矣

東坡書院記

劉春

距嘉州東涉江而北不五里爲龍泓山其巔平衍四

曠有洗墨池焉池上有魚化龍字正統戊辰州人東
山居士劉公洪禹者博雅君子也登山見之謂與左
爛柯巖洞字筆法一律爛柯巖洞者東坡墨刻也因
撫然曰東坡眉人眉與嘉接壤公嘗曰天下山水在
蜀蜀之山水在嘉州此在爲公潛隱之地遂創爲屋
若干間肖公像於中而名曰東坡書院復募僧居之
以給灑掃奠獻之役令其從子肅敬之子節介之讀
書其間成化丙戌敬之舉進士累官御史今爲方伯
而風裁凜凜癸卯介之亦舉進士於鄉今爲夷陵太

守政化大行而東山公也棄世矣介之時至其院見
其堂室爲風雨浸損且就傾圯僧之事事者弗度乃
掀然曰此吾先君子所以表先哲引後賢之舉也不
可使鞠爲榛莽如前因加脩葺而嘉州太守永興曾
執初公見之曰是吾貴也乃相成之而黃門童君世
奇適至曰不可使無所考於將來屬余爲記夫世之
賢豪英哲其風聲氣烈俊備不拔者在當時多屈抑
折挫然其實有諸內則其名亦隨之至於久而益振
矣若東坡初應制郎以文章妙天下歐陽子見之曰

吾嘗避此人放出一頭地宋神宗讀其文必嘆曰奇才然而自筮仕至歸沒四十年立朝者前後不滿一載中間因事立言因地建功挺然不群而亦以此賈禍崎嶇嶺海而卒不變蓋其在朝也不知有其身其在外也如在朝而忠義之節夷險一致故雖未嘗終其身立於朝廷之上而其風聲氣烈使人感慕慨嘆以爲不究其用百世而下仰其名誦其文章論其世思欲見之而不可得則從而考其遺跡以表章之如見其人使有所興起焉况其過化之所乎此東坡書

院之所由作也於呼是豈非實有諸內者耶觀于是則君子之自處惟求其是信之篤行之力固不必以一時之得喪置忻戚而尚友者亦未可以成敗爲進退也余懼州之士藏脩游息於其間者跡其事而感焉因告紀其書院之戒若太守之清慎好古樂成人之美以勵風化而介之汲汲繼述先人孝思不忘尋將啓厥後之科第雲仍者咸潛脩于斯也是皆有可書也

太益書院記

陸深

嘉靖十有五年丙申冬大益書院告成書院在今四川省城之東北隅四川古蜀都而益州蜀古名也惟我

朝聲教暨萬里而四川號稱大藩合今昔之嘉名命之曰大益書院而書院之大者凡以文化輔

聖治也與古四書院之制同今

天子中興加意文教薄海內外蔚然向風矣而是書院之成適當禮樂大明之後于時四川巡撫都察院右副都御史西野張公瀚巡按監察御史王洲陸公

林相與落之而顧謂深宜記深自乙未夏來轄蜀司
與聞斯事稽諸案牘盖有正德戊寅歲提督學校僉
事王公廷相寔始其事卽故少師萬文成公之舊寓
前爲講堂後爲燕寢翼以左右之室列爲五齋進爲
先賢之祠祠之門閣統以垣墻于是書院之體位立
矣繼之者副使張公邦奇端方指授于是書院之師
模具矣士之來學者咸彬彬然迨按御史盧公雍熊
公相助以金五百于是書院之潤飾裕矣迨撫都御
史許公廷光巡按御史黎公龍提學副使歐陽公重

知成都府劉天澤上遵益以廡舍實嘉靖之甲申歲也巡按御史范公永鑾劉公黼相繼買田于雙流以六白金歲入以四百六十餘石于是書院之居養裕矣副使江公良貴出學道贖金凡四百左布政使林公茂達按察使許公讚相與佐協以廣門衢之地于是書院之觀瞻偉矣會張公鯤以副使來督學政請于巡按御史熊公爵加葺理焉甲午之歲僉事顧公陽和踵至請于巡撫都御史范公嵩潘公鑑再新之于是書院之基構永矣巡按御史鄒公堯臣以爲未

足也再檄知府邵經濟拓之潘公申之曰茲惟母後
時凡費重以三百金于是書院之地廢起矣經濟乃
具石請書其事以昭來世深按春秋之法最重興作
凡始事必書凡終事必書是役也歷年二十經營數
公前此所未有也不大益于蜀乎在易有之震下巽
上其卦曰益益之彖曰損上益下益之象曰遷善改
過夫損上益下政也遷善改過學也學與政通學所
以學爲政也諸生蓋顧名以思義乎學成而出持是
以佐我

未見其人也溫甫殆其人也非歟溫甫屬予記予未
嘗一至平山而平山巖巖之氣象斬然壁立而不可
犯者固可想而知其不異於溫甫之爲人也以溫甫
之語予者記之

重修成都府儒學記 曹樓

余覽史籍見文翁當漢武時天下承秦後人不知學
蜀最僻陋而獨有建學校遣子弟入太常脩先聖業
其效至文學比齊魯嘗嘆美之思一觀其遺風焉已
而承乏拜西川督學之命安治之明日祇謁

先師周視學舍見其規制赫奕氣象森古詢之則相
傳爲禮殿之舊蓋啾然有餘感也學故脩葺於弘治
之十三年越六周星圯壞湫塵傾欹支拄時久則敝
理固然顧非所以妥聖賢而崇文教况有郡寔全蜀
之倡泮宮尤具瞻之地哉欲新之無與計者適郡守
耿侯初至見與余意合而或者難之謂費非數千金
未易辦役非二三年未卒就况本政旁午事在中柅
耿大不然請得外府金五百票千石勤里旅三月而
以落成告余視焉則殿廡更新門堂重麗黝堊丹碧

綦錯熒煌石砌堅完垣堦峻整不獨師儒寧其居而
聖賢棲靈之所亦足以肅拜瞻而虔禋祀矣心樂其
成而異其速論其故則費大半出耿侯俸錢而父老
子弟嚮方慕善任勞宣力者咸激于侯之義故財不
訕公帑工不費時月而事以克竣學博士及弟子員
請余記以傳夫文學吾職也記惡可已爲之記曰吾
聖人之術等于天地彌綸乎宇宙而貫徹乎人心生
民舍是無爲命脉美官師是舍無爲政教矣彼文翁
何人漢何時而乃力行教化大振文風豈吾道有將

目之遲而有試之蜀抑天將開蜀人文之盛而潛啓其衷耶一時即有司馬相如張寬輩顯于朝後之學士大夫誦詞賦之英誇七車之富不獨羨二子而歸德文翁雖賢不有二子亦無以成其美也矧今熙洽之朝隆於漢代師帥之賢不讓文翁而蜀士之盛遠邁古昔其何以自樹立而稱飭學者意卽以學宮喻夫子宮牆稱高美然五倫其棟樑也六經其門戶也而其理具於吾心自有繩墨者在焉子亦見夫匠氏之營斯學者乎基址奠矣群材具矣必端其意嚮注

其神視直以繩經以墨而後門列戶分棟隆楹峙數
仞之牆指顧而成則脉理貫通而搯之有要也學亦
如是矣今聖道稱大明而人各就其性之所近安于
意之所嚮以自爲習百家諸子乘間開竇爭門名家
啓岐途而塞道眞鈞竒翼詭之士博聲華競世利蔑
棄倫紀綱常于不恤盍身遊聖域賢關之內而不覺
自竄于戎徼夷畝之外戾于夫子之指矣耿侯新斯
學也夫亦有厚望焉爾諸生處止其中而欲不愧斯
學其說在聖訓而其事在日用也毋迂覲誠正之說

則繩墨端母支離六經之門戶則趨何審母撓折五
倫之棟楹則植立固聖人之堂與吾且登焉而漸于
入室卽端木氏所稱矣與富者心親之而身有之矣
此學庶不虛哉若飭華而漓其實累高而削其址過
孔子之門牆衆且麾之彼文園侍中尚不負文翁尔
諸士亮不忍負耿侯必有進而求之者矣耿侯諱定
力楚之麻城人起家進士初爲駕部郎有聲其學實
宗伯氏伯氏倡道東南爲海內宗侯講其業故治尚
德化崇本務若此舉亦其守成都有事而佐之者則

俞君紹李君延誥若中丞先涇陽雒公今宛陵徐公
待御先天雄赫公今豫章陳公尊聖石文主計協
議而方伯魏公憲憲朱公愈憲謝公崇儒重學捐金
佐費績宜併紀以詔後來者云

成都府脩學記

耿定力

成都郡學在錦城南規制壯麗擬王宮歲久弗繕日
就圯萬曆癸未夏不佞入郡受事有謁
先師延見學官弟子周跡頽垣敗壁廟廡風雨不蔽
學官僦屋而居間用齋閣爲寢室貧生露處號舍中

惻然閔念欲新之檄邑令張懋劉寅計工匠土木費
逾三千公帑不能具越明年圯益甚乃檢帑金五百
有奇庾粟千石請于當路經營伊始會司空下令採
巨材天子再四丁寧蜀吏民疲于奔命迺偕郡丞
俞君紹司理李君廷謨召諸弟子計曰國有大役能
更征力於民乎曰否能更取材於山乎曰否強幹之
吏分道而出太守能以身日夕省試乎曰否公府之
役能禁不速成而易朽乎曰否不佞喟然歎曰梵宇
神祠煇皇金碧大竭誠千人嚮應彼何爲者三三

子其謀之父兄旦日李可等二十餘人蒲伏請曰聞
明府留意造士也我等頓無愛心力不佞屬耆老而
告之曰若有子弟吾子弟之吾懷樂育若樂成之過
觀厥成爰旌爾伐維是不佞捐俸給焉經歷王樞用
米粟鳩工募夫無乏者老辰夕軍事各出所有良材
爭先告竣費不及原議之半而堅固壯麗有加則諸
耆老力也鄉薦紳左司馬高公以下遞來勞工而孝
廉戴楠時鼓舞之始甲申冬十月一月乙酉三月落
成是月也天子用禮官言以近代陳王胡三子從祀

檄下乃幸弟子釋菜告先師奉三子主入兩廡已
召耆老而旌之幸弟子謁謝當路及助工費者不佞
申言曰田舍翁辰起督家僮墾田疇計米鹽出入敲
朴不用命者如斯而已子弟之教學弗問也其習聞
教學者稍稍勸家塾時供饋尊理明師如斯而已子
弟之勤惰弗問也不佞守郡數歲日司錢穀理爰書
敝敝焉不能以身率先徒藉父老之力爲子弟葺學
宮而視學使者初爲新安曹先生吉州郭先生繼之
新安宗元晦朱子吉州宗伯安王子由二子以窺夫

予堂與兩先生各得所宗矣不佞自通藉受兩先生
益不獨入蜀始同諸生北面也諸生無忘明師之訓
庶幾哉各得所宗以無負夫子宮牆異日者不佞譬
則田舍翁享有子弟榮名自多糊塾尊師之功則不
佞厚幸矣

大儒祠記

耿定力

成都之有大邑書院剏自正德戊寅歲越嘉靖甲申
始落成卽萬眉州相府故址也督學使者萃三川髦
士爲除舍授廩立程而教之一時號稱得人內江趙

大洲先生其最著者以宋周元公曾參判合州二程
侍太中廣漢伊川又涪州編管尹和靖就其師涪州
注易與華陽范淳甫綿竹張敬夫蒲江魏華父俱祠
祀之使諸生有所矜式已考明薛敬軒以大理督餉
至蔣道林以觀察水利至與合州鄰立齋祠祀祠中
歲丙寅豫章胡廬山先生入蜀督學首定祀典萬曆
丁丑故相張江陵盡毀宇內書院毋使諸生聚議大
邑書院亦在毀中諸儒本主尚存弗祀也歲丁亥督
學使豫章郭相奎先生爲胡公高第展謁詞下低回

嘆曰學以景行祀以志思大儒在蜀可弗祀乎爰檄
郡邑脩祀事題曰大儒祠函諸生請又以大洲廬山
及前觀察使孫淮海祠王入祀命不佞力記之不佞
力念洪荒旣闢維世覺人曰君與師自天子以至一
郡一邑之長皆君也有聖人以至一言一行之善皆
師也君之治績顯而易見師之教澤隱而難明然不
藉名位不假刑賞風施奕世澤流罔極尤稱師哉大
哉孔子爲萬世師矣漢唐鮮眞儒蜀以詞賦擅名學
者貿貿焉莫知所師元公崛起荆楚王靜立極蜀其

過化也彼其初風之未同蜀與中原尚分黨而角立
迨其旣也張魏三公同聲相應異世而宗濂洛之教
信哉師道立而善人多矣淳夫文章節義蜀人所共
推轂而依依與吟風弄月者爲伍豈無所師承耶明
聖人御宇作之君師淳化所漸眞儒輩出士之秉道
而入蜀與蜀之應運而名世者皆薄辭章而崇本實
尚躬行而窮性命無論漢唐蓋馭馭乎由元公以上
溯孔子皆然矣古者上帝有專祀列國祀其境內山
川諸雋在蜀辟則名山大川也昔元祀也不出蜀都而

有餘師焉可已哉世人欣艷貴富者至天子之宰相
極矣萬眉州不能撫有第宅張江陵不能禁人之必
不崇儒亘古今參天地在此而不在彼學者其重有
省夫

新脩楊子雲草玄堂記 范涑

蜀自黷亂立國神明之胄輒有鴻裁今所傳詩四章質
雅道眞實寶維德厥訓遠矣故代有發藻闡奇如王
子淵司馬長卿以下疇非秋林赤幟哉要之轡文龍
虎各以詞勝于道眞無與焉時維楊子雲氏深沉聖

學體撰契神其大人長揚諸賦尚土直一斑勿論論
其大者爲法言又爲太玄經三摹九据悉根于性命
天道洩羲文周孔所未洩卽中原稷下群儒瞠乎其
後猥云雕蟲能之乎說者猶疵其擬易殆淺之乎口
耳窺也甚至以仕莽相蒙投閣美新訛傳口實舉天
下之大不遑身自爲之雖紫陽文公尚未暇呼晷其
枉矧瑣瑣者耶不敏稽古證今知于雲必不仕莽者
爲說有五古者擬人必于其倫揚子比孟荀所從來
久矣蓋乎何如人並駕推尊則揚可類也史稱郢縣

大司空何君公新繁太中太張公濡中郎侯直孟
皆以不附莽見殺此三君者予雲之臭味也先後同
時川縣同地而時論以名流領袖但推予雲仕莽之
事三君且不屑謂予雲屑之乎此以理而知之法言
品藻漢興以來將相名臣獨不及莽昔莽已專漢政
伊周自咻乃簡裘一字愛于千金是何落落也悲丁
傅董賢用事托志于解嘲知玄知默惟跡惟滅又屢
斥公孫弘之容而曰如詘道信身雖天下不可爲夫
況以咳唾爲華袞詎肯以出處爲溝壑且素羞比干

嬖寵又豈失身于篡朝此以其言而知之子雲始爲
郎給事黃門與莽賢等相頡頏夫夫者後皆爲三公
權傾人主所薦莫不拔擢而子雲歷成哀平三世不
徙官董桂之性愈老愈烈卽反回事其所不屑莽安
肯信之况莽篡逆晉諸文學以符命獲封爵者甚衆
卽位之後欲絕其原以神前事而豐子尋歆子棻復
有所獻莽遂誅尋棻授諸四裔子雲故同官子莽而
素不附莽者也若先時乘其大逆而傾身以殉則可
驟貴加封爵之榮若後時復美新觸其厭諱則莽必

借之洩怒以示天下而有恭尋之戮爾者子雲無一
焉此以其行而知之嘗讀子雲本傳稱雄有大度自
守泊如疊疊數千言未言仕莽獨贊謂其受莽官作
符命援閣年七十一天鳳五年卒攷子雲赴京見成
帝年已四十餘矣自成帝建始改元歲在己丑至莽
篡位建國元年己巳相去四十一年建國至天鳳五
年戊寅又十年則子雲近百歲與七十一之數何其
抵牾也即使建國元年遂仕莽歲亦八十餘子雲無
耄耋壽安能起白骨而肉之仕之乎再攷桓譚新語

雄作甘泉賦一有夢腸出收而內之明日遂卒祠其
泉在成帝永始四年戊申去莽篡位遠卽未必卒于
永始斷亦不出于平帝永年蓋其歲正與七十餘者
合也乃云媚莽受爵不大謬乎此以歷年圖而知之
前代名家爲揚子忠臣者甚夥其在蜀疑以桑梓故
姑不引若陸公紀之述玄也邇王邑嚴尤桓譚張平
子諸人所崇尚而繼之曰雄受氣純和譚眞含道建
立玄經雖周公繇入揚孔子脩春秋不能是過歟之
事今宜曰聖人司馬君實之法言注世力辯揚子要

恬非求媚而思富貴贊美伊周諷奔北面曾子固亦
王深甫之論雄書也比于箕子之明夷又擬于孔子
之堅白惜其于雄之事有所不通且求其意而未明
辯事莽之非殆抱遺憾然尤有所互證者大醇小疵
則稱于韓退之玄經有測美厥靈稂雖程叔子深有
取焉邵堯夫王介甫亦每尊信其說而叔子又謂閣
百尺未必能接介甫亟以授閣爲妄皆可爲斷案近
世胡正甫焦弱侯劉元丙具有始末辯美新辯且曰
揚雄谷永並字子雲劇秦美新乃永文非雄文猶史

載子我仕陳桓孔子耻之指爲宰予而不知闕止亦
字子我也敘贊之詞傳失其實蓋孟堅早世曹大家
輩別有所聞而附益之不然孟堅述雄書極嘆子雲
文誼至深論不詭于聖人若使遭遇時君更閱賢智
爲所稱善則必度越諸子矣述事若此敘贊若彼不
幾自矛盾乎此又以漢唐宋諸儒之論覈而知之然
則子雲之謗何以致此世之臉主已心稔毒者何限
盛名之下借附滋多夫人欲速其功者借伊尹主璧
幸爲捷徑者借孔子五威將軍班符命四十有八類

當時名高者所爲安知不忌子雲之軋已也而借之以自文且依稀懿爍炳炳麟麟襲其毫吻噫險矣哉不敏官豫章嘗欲與多人著古今平反錄一書首白子雲而力未逮歲丙申承乏叅蜀藩詢子雲故里在署武擔山南復閱舊志宋慶曆間何滂記墨池有準易堂繪子雲像池心築臺其上有解嘲亭宴會之所有吐鳳軒今皆失其處獨街旁碑石一片鐫墨池二字乃耿中丞子健襲守隄時立者字出水元章筆點書風致而墨池遺跡溷于賈區蕪穢潢汙寄足無

地因檄成都施令所學按籍求之會左伯程公叔明
已先下其議施令遂商之華陽張令埏共聞之郡守
協心力以應左伯又請之

蜀國主樂捐池北店十一架地縱十一丈有奇橫二
丈有奇池左地縱丈同橫得二之一居民茶近池畔
傾售者給其值亦得地十丈有奇時觀察使沈公大
叅董公學憲王公巡憲劉公以叅黃公關司徐公淡
公遊肇劉公各以薪餼助復有右伯劉公觀察譙軍
驛吳公以公事旋助亦如之而一切經畫悉受

左伯督理于施令構材必擇鉅麗者石理正甃必擇
堅緻者卜吉興事抱坎面離北爲草玄堂六楹幹軒
敞豁黜聖絢承稱是堂前爲平臺臺前卽墨池濬闊
逾于舊址甃石以方之池前爲西蜀子雲亭堂後開
隙地植陰木紉涼堂左右爲庖廡兩翼之南爲
碑亭二又南各遶池爲欄砌綿亘相望可時褰卉奇
葩列文石映清波以懋以游談學娛賓無適而非適
錦城勝跡茂有石之者堂東爲儀門外爲大門繚垣
蓋覆完密一周總計亭堂池地廣二百二十六尺袤

倍之二門地袤六十餘尺廣半之垣圍共八十六丈
四尺工勦于丁酉仲夏竣于戊戌孟冬所費緡以五
百計諸司道前後二郡守二邑令所助得二百餘緡
外皆左伯約已積贏以濟之上不煩官帑下爲貧民
食其力落成諸公以遷擢行者六七人獨左伯學憲
偕不敏暨茲歲繼至右伯周公觀察使王公前郡守
轉今巡憲陳公共登堂融洩移日徘徊吊古聚散興
思各益于題詠之外酒酣耳熱左伯復舉爵揖不敏
余每聞子慎揚氏覆盆今有異地矣表章先哲範茲

來許監司者事也請屬詞不敏愧無文而夙昔私蓄
欲藉手以雪文憶慶曆墨池記亭堂諸製皆當時樞
密程公敦尚名義取材辯方乃致底績歷今六百年
復鼎新于程左伯聲應氣求遠相符合數豈偶然哉
爰述子雲本實并剏構歲月著于篇且使天下後世
有抱道好脩者知浮議不能掩其光雖千載而下猶
有知已何損之有而汗鱗高良自謂得計者知愈久
愈于公論何益之有茲役也其于世教人心庶萬一
有補焉

德陽縣儒學復古經樓碑記

樊鼎遇

惟夫姪空顯質具有神理之宗設位沅形卽爲文字
之祖東壁大書秘府耀炳雙珠西崑地冊靈樞精藏
群玉丹書金版龍關開太昊之圖金簡綠文滄水授
文命之策此皆繩契未造恭留呵護隱章然則事豈
人謀吹皆天籟出入三光之道環坤腹以奠生周徧
九有之民秉分星而別度茫華胡漢所以辯族類而
繫萬民複簡隱明所以絕人神而察百物火符雷篆

譚之卓有師傳虎畫狐編窺之更奪人巧凡鳥獸鳴
動亦蠢蠢感其誠通或風水激踊且宮商露其變狀
雖各通其情而天地萬物之情並見雖各道其性而
天地萬物之性並呈俱聖俱靈厝矣大矣惟是劉宗
徐疾五性殊方專普龐純列國爲政蕪之是非同異
譎雅俚都自開闢以至獲麟三百二十七萬六千歲
萬方所記十紀之書空委宛之鼎不足閣其政典鑒
觴謨之室不足載其方家周末益以縱橫秦火會應
酷電所以仲尼慈憫萬世約究多聞乃定禮樂而脩

舊章刪古詩而存三百讚易道以黜八索述職方以
除九丘斷三墳五典自唐虞約列國史記爲春秋益
始翦其繁蕪一就典雅刊其踳駁並受折衷名爲七
經道揭千古然後西見柱史藏之王室周遊國邑演
之疇人脩函夾于杏林漁父謂而罔介講俎豆于宋
樹桓魋伐而無危不必七十二君之能行凡有國者
不可不知其義不必三千弟子之優聖凡有識者欲
使盡讀其書猶恐世有廢興家壁藏蝌蚪古字人懷
疑信地機儲絲竹靈音是以秦炬雖炎祇能燼洪荒

草創之冗穢漢律初經節能合諸儒口筆爲篇章自此代置學官經分牒士家以之式行國以之官人遂踴灼爛于百家莫能覩其牒奧窮精蘊于二氏終不出其範圍備帝王損益之權盡人道綱維之理良定心續命之傳寶罕物經世之懸圖也奠兩楹之夢已垂大牢闕里之時齊衆喙之鳴何啻一馬天地之喻王都侯國辟雍頴官并傑閣而陳宗祀之文特危樓而藏鼓篋之恭嚴始羨墻之地無經籍則衆志不興尊崇絃誦之基非壯麗則真靈不集錦標寶軸卷帙

極華淨之方桂棟蘭楹刻鏤窮輪奐之美旁通七畧
四部猶懼不足羽翼聖真高亢日牖月欄尚疑未能
登闕大道師各重其本教人自悅其家珎易地皆然
由來尚矣德陽儒學講堂右隙有宋學士邑人章公
森書經樓字碑字體竟尺書法八分嚴整若魯公之
儀道麗得中即之意碑足則有宋進士范執中紀群
公興學盡肯構肯堂之勤碑陰則有明育令夫已氏
鏤卧碑字痕發注金彈珠之嘆隆寧仆而復立則羅
令錦吊古興嗟之思典刑晦而後章則柳諭維臨池

紀勝之力然委諸草莽不能言若復其芸蘭人應
弘道鼎遇忝蒞茲土幸與斯文慨富有之業不新蓋
一令因循一令惟慮始之殆難任將後人復咲前人
跡雖異代而感長懷忍當吾世而失盛事爲之列上
當道自文武興隆之繇因之遠購全經廣學士博通
之路恭遇 監察御史朱公廬江正學觀海鴻文破
柱埋輪曾射狼狐于輦轂銷鋒臥鼓不驚犬豕于封
疆駐節而細論文帙括盡談天之奧攬轡而亟興廢
建立樹根道之標兼遇本道大叅曹公八閩小逸四

海宿宗玉潤水清藐姑射喻其神骨和聲緩節王摩詰似其詩文每錄金石遺言必扣巖瀾絕地本省督學魏公名臣嫡胤桃圃宗門藻鑒人倫夙擬天曹綱紀衡程方類重新蜀部風猷拔士皆得其尤作人于斯爲盛本府太守張公荆楚偉度觚管鉅公十載爲郎雞群驚其野鶴一麾出守蛙郡詘以海鰲魯諸生半在門墻舊掄材揚馬王嚴之地邑列侯多象風指謹追躅李文肅趙之規本府司理楊公洞庭澄波祝融朗照平反百獄胡威清畏人知題品群材山濤光

膺帝鑒觀仁于過若清獻之不失元公錄善于微耶
平仲之立解越石緣茲從史覆議允行幸遇邑中憲
大夫曾公家絳魯誥楚笈竺墳紫鱣畢臯比之譚白
馬演龍象之辯立朝正色片言不及私門過里飭躬
五尺不干孱令趙相國之解脫化其剛稜黃太史之
玄通得其主棟本學教諭王公卿子名宗單父清望
鸞眸鵠立健翮有凌雲之思豹蔚虎文猛氣負開山
之力發蒙罔憚其煩苦爲道不愛其拮据相與率邑
官僚電轟締構共鼓通庠衿帶鸞集觀摩螢誦雪吟

觸日見琳瑯珠玉牖窺山望會心捨階筏筌筌度其
成不逾時教未匝月童冠刷羽而冀鴻陸數倍前人
賢良燒尾而躍龍門燕閑三彥于是接境比封之士
把袂而來問奇講德之朋填履而入至于道人法子
乘杯按躡以印心曹吏山民獻書錄訣以備目先聲
已證實効積學自有真儒此皆 聖主右文乂道逢
化成之會 先師翊教陰陽得感通之神故一時公
興盡擅墨林匠手而四境冠履同任德圃子肩鼎遇
小吏何以獲茲薦紳先生實貺臨此自古獲麟之後

至今 龍飛之年三十四甲子記載之文方家之說
博雅君子之所通考慧心文人之所裁制繁盈鄴架
重溢洛車帝室藏書之富代有污隆高門積襲之多
家或偶國漢通七畧三萬三千九百卷隋錄西京三
十七萬卷唐列四庫八萬九千四百卷宋崇文目三
萬六百六十九卷張茂先入洛載書三十車李公擇
山房藏書九千卷宋宣憲校讐定本三萬卷名家藏
書如南都戚氏歷楊沈氏等少者數千卷多至四萬
卷葉从蘊从貴博收遂逾千萬卷今鼎遇所藏經僅

十三史僅二十一子僅二十集僅二通并學官弟子
制傳注性理通鑑綱目及昭代名史數種共一百一
十八函計四千二百三十二卷擬古則涼不足稱明
經亦要而匪濫良以多多爲善姑俟徐徐積儲凡茲
散漫簡篇皆歷代乾坤之精蘊若假神聖筆削斯六
經性道之文章遠考宋儒馬端臨餘古今經籍志近
見白下焦太史作明史經籍志舉道釋兩藏之教卽
敘列諸子之中果得刪述方家因之大一統類千萬
億卷之義自可約爲一篇千萬億千之文復可精藏

一學薰猶何病于芳臭鳬鵠焉慮其短長作者尚未
有人收之木厭其禿尚當備二氏之法寶何況獮諸
儒之碎金但今古大觀急借閱肆之友終始大業尤
須堅忍之儒過庭錄言六經予史之善者通不過三
千卷成人日閱一卷二十年可以再尋歐陽公言九
經正文通不過四十七萬八千九百九十五字童子
日誦三百不五年畧可上口徐盛年過八十猶歲讀
五經一編劉原父初欲窮經卽手寫六經一通茲由
深味義根故終身固堅白之好窮蒐道與故畢力游

爲永之途先聖焚策命盡日中尚取書延客刻而後已學之謂何蘇子瞻言老儒先生自言以時求史記漢書且不可得得則手自書寫日夜誦讀後生科舉之士目見諸子百家摹刻易致致即束書不觀游談無根縑朽骨而發陳願精心尚詆爲書肆美四寸而忘七尺密繕且咲爲說鈴矧目不徧三篋之藏口唯授一師之說取科第之資不足詎天人之際可言期與求學實講之母以故事虛崇尚之也治子學而爲表調因五絨爲七屬之用孫郎圖而索驥至以去

父月山子之名聖人卷終南面而不釋然其所憂者
大也小人冠蓋里閭而有態色其所忘者多也不成
位兩間靡拓愼懔六字之綱第縻情好爵孰詣高明
良貴之階諸生感起卽利賓王鼎遇盟期終願學孔
周孔以公輔爲載公輔有乘騎跂之時夔龍以餽祿
養庶餽祿有養虎豹之日若夫介然抱一物至孟棺
而不脫悠然空萬有臨納麓而不驚樂則行之憂則
違之卷懷靈客鴻寶生乎由是死乎由是歸藏貞耀
玄珠是則堯舜之心至今豈懷山稽天所能溺仲尼

之王萬世詎炎岡烈澤所能焚匪劉炫之隋墳真得
石經古本異舒公之周禮親繙竹簡添書事理罔克
溺之沈酣恣所取耳興復大義布露微懷估直齊上
臺司節目副在曹叅銘曰太厯惟靈幽氣質形剗剖
圓方布列星辰經緯日月殺列川陵抽莖數葉縷析
條分彫形鏤體脉絡并森龍圖龜畫馬鬣魚鱗珠光
玉彩赭丹黛青風聲雷號鳥語獸鳴魁工神巧傳會
聖心思通穆邈理徹玄冥結想擬化摘詞象鉤祛知
簡智閑邪存誠點澤體實安駁歸純識小識大澤見

擇聞百王合符千里印負易準天地孝先溷沌禮本
太乙樂超氣聲書陳中極詩道和溫春秋刑書亂賊
是懲典雅興博是曰七經道兼覆載義炳日星萬世
素王二論心精異時同學子與一人周官戴記與禮
參明爾雅注詩公穀異經十三總錄開元所尊諸子
百家麗奇嬋斌箱輶輪轂合而車行巖廊魏闕何材
不賓二氏角立倣詭幻冥偃師優孟舉止亂貞非宜
聖旨妙演靈根龍門虎視百代揖英軒黃及漢裁綴
創新筆劍所擊長短縱橫史匠繩墨文工典刑孟堅

以下嚴秉法程具體肖貌駢隤失神洗華露質削弱
傷塊澹際論集通志爰成考度辯惑博物遂生端臨
摠攬通考酌斟憲章備矣禮樂攸存詞章藻績行遠
腴身昭明之選弘麗和平一洗惡陋單寒浮榛文苑
次之披瀝鍊金傳注性鑑代制所欽予史諸集極博
明經採華摭實捐短錄贏道我達意證彼注心野人
質耳君子彬彬廣心大畜巨細盡倫唯聖希天乃與
斯文

補續全蜀志文志卷之二十五

黃岡杜應芳

裁訂

景陵胡承詔

記

黔江縣題名記

黃庭堅

黔江縣治所自秦關黔中郡時歌羅蠻聚落也於今
爲縣二鄉七里戶有千二百其秋賦庸顧不登三十
萬錢以地產役于公者八十有五其義軍二千九百
招諭夷自附其衆者五百七十其役於公之人質野

畏事大畧與義軍夷將領不殊也使之非其義或耽
梁不爲用決訟失其情或虜掠以償有暗則小智者
亦潛躍畔而爲欺懦則細黠吏亦能用其柄市麝膽
以百計市蜂蠟以千計則夷以長吏爲侮寬則以利
啗胥徒而苟免猛則鳥獸駭而走箐中矣至今得其
人櫓垢爬庠民以搜堵而異時號爲難治吾不知其
爲說也

四川布政使司題名記

溫仁和

今天下諸司其建置沿革風土物產山川人物仕宦

美政莫不盡此在右今志記詳矣其官寮蒞任遷代
籍里名氏或郡邑書或藩省書此又足以備志記於
他日有不得不慎者夫殊方異產之人來蒞茲土有
姓瞻望而莫知其姓氏轉移代更而渾忘其歲時此
謂之無情茲土亦可也久任之法沮以官爲氏不復
可見故任官以歲計而題名日益盛矣布政司舊有
石題名在儀門左蓋有

國初至今凡寄承宣之任者咸有名氏鄉邑遷代歲
時畫之固云備矣顧其刻已滿將無以紀後至以示

方來今左布政使張公廷獻右布政使華公商鼎廼
於政暇別樹一石用續近歲諸寮氏名而託記於予
予惟

國家置省建官凡以爲民也士之始進也書其籍書
其年書其世書其業固以榮其身也榮其身固以維
其心也既仕矣有考課有升黜升未及者旌獎及焉
黜未及者抑謫加焉內外有階並服有等固以厲其
心也厲其心固以堅其守也是皆以名役衆也使天
下不畏名則惰者弛鈍者靡墨者奪忍者害其胡能

有爲民之意哉是故名者礪世之具也今諸公登名
茲石豈欲侈顯榮誇美政自爲身計哉常謂游宦如
傳舍歲時等流塵苟知宦歷不常寓則宣德達情之
意勿容緩也苟知歲時不再得則顧名思義之意弗
使廢也後之有考者曰某也久某也暫某也賢某也
不肖此公論在人心百事之下有不可昧者石又未
可盡書也凡名茲石者左右布政使左右叅政叅議
凡若干人其首領諸屬凡若干人副是來蒞茲職者
則以次附著蓋亦題名例也

重慶府題名記

張希召

渝州於古爲名郡寔五溪四蜀間一都會也在禹貢
殷周爲梁州之域天文井鬼之星秦漢唐宋爲南平
州郡考之傳志守倅以循良稱者亦不多得蓋以職
在近民得人與否利害輒應而天下之治忽胥于此
乎繫焉朕任可謂重矣哉

聖朝誕一寰宇建官分治尤慎斯選自洪武初以迄
于今閱歲滋久其間名宦趾矣鱣鱣爭烈而題名未
有爲之者隆慶庚午春余以地卿卽官出守茲都守

那時貴陽戴子晃泰和王子懷梅先後爲以府蒲圻
熊子兆祥淳化李子承薰爲通判河西馬子應乾永
昌鐵子篆相繼爲推府諸君子皆慈和宣懿因亮通
敏所謂循良之士也迄萬曆癸酉夏余與二三僚衆
小宴于金碧山堂乘政暇稍往牒詢遺跡凡得守倅
者于入惕然作曰此而耶識何以示後廼命巴縣儒
學教諭趙文明彙次其名址及履歷之槩謀刻諸石
以傳永久竊按郡職志而品題之曰先哲世遠無考
已由甲子而前其政簡其民淳由乙丑而後其政細

其民偷何也俞曰願有聞也鳳樓子曰巴蔓黔纏萬
戶輿圖千里上世以來頗同渾朴邇年蠱賊潛起兵
燹煽殃舟馬漸衝迎送始悻賦役寢見繁劇州縣愈
多事而瘡痍日啖啖也加之以郡守弗克師師者或
汙或僻或闇或隨意競絀不恤其下欲民之不偷
得乎此無他也在民淳事簡之秋雖王成之僞猶足
以爲今天下閭閻凋瘵風俗澆漓匪昔者比卽以龔
黃召杜治之猶不易矧濟以王成之僞徒規規苟且
目前以需速化而於民生休戚國家利病恬莫之顧

雖欲求理不幾於諱病而忌醫哉此余之所以觸目
激中而亟爲撫摩綏養之計朝夕皇皇三年于茲矣
雖未必能稱政通人和而安良福究吏良民懷檢點
行囊寒鶴自娛所可自警者秉公劑度俾無負先大
父清白之訓耳是舉也思以企前循而垂後鑒誠非
細故嗣是蒞茲上者相觀而警循名責實凜然知所
趨向以先代諸賢自期待由是而上追虞周之盛使
他日修明史傳循良著有標焉則於

朝廷建官分治之初意不因以少慰其萬分之一耶

不然吾恐後之人必有指其名而議之者傳曰竭澤而漁明年無魚吾儕可不懼哉可不懼哉既立石悉勒今昔同寅名氏鴛鴦行列及空其餘以俟後之君子

兵巡道題名記

王乾章

川東有按察分司司巡察重慶舊矣未有兼兵備者兼之自乾章奉 璽書從事始且重慶分上下川東上川東所轄一府三州十七縣一徯二所夷司之大者宣慰曰播州宣撫曰酉陽次則黃坪草塘二安撫

司又自平茶邑梅而下九長官司咸隸焉若曰有理
勢直枉者惟分司是赴無論夷漢有草竊潢池者或
勦或撫惟兵備者相機宜而順行之所以專責成示
不得他委也夫分隸川東建牙渝郡自祖宗以來
群公可指數也至不肖無如乾而且巡且兵兼而理
之者獨始自乾蟲疑蚤負覆餗之懼盖靡朝夕寧已
泊事事之初案牘絕乎塵封閭閻寂乎鳴吠辰而出
盡已而退申而出盡酉而退無留時無廢事豈乾也
力足任此哉脫使干時有廖鵠曹甫之警有轉戰調

發之艱卽欲優游暇逸將能之乎夫經營堂構備而後居室者可安也帆樯舵槳備而後操舟者可濟也以今日坐理之逸豫追惟昔者有事之憂虞皆辟公所貽多福稍遠者勿論矣卽如乾未承乏之先良齋喬公當事時有黃甲者負固支羅肆行抄掠喬已督餉隨征矣旣而妖賊田統等蠭起蔓延旁邑破城縛長吏劫庫金川東響震危切累躬顧此則失彼援內則縱外喬竟以失事抵罪嗚呼朕惟艱哉舊分司未有題名乾懼辟公久益就湮沒也乃搜輯舊志自談

公恭而下得四十九人題名而樹之堂側監往跡而
起懼視前哲而思齊間有攸行未敷輿論者亦因以
省惕焉所以備古鑑立政模也夫自今而觀辟公則
辟公往矣由未來者而觀今今獨非往乎辟公經畧
之績或至今而一旦墜落後來繼今者將謂我何故
堞雉必飭謹覆隍也門樓必葺豫桑土也簡閱必時
憂日中也器械必備慮徒搏也穴竊必懲防燎原也
視予輩之所及若孜孜焉不遺余力息負伐檀之刺
以隳前烈以貽後羞覆餗庶可免矣爰命巴縣鑿碑

而予自爲記記成以請大叅自山曹公公曰歸美前
達遜也不嫌敘已事直也惟什焉虞慎也區區補塞
欲以貽之來者公也公以存之願以處之直而且遜
可巡可兵美廼鑄之珉石用垂永觀

四川布政司題名記

王志遠

高皇帝改行中書省爲承宣布政使司置左右使秩
二品俾綱紀有城於政無所不統理或以亞卿出爲
布政使或以布政使行總督巡撫事其重如此厥後
寢失其職其自爲與人之口之槩曰錢穀之司職者

慨之迨至今日併錢穀之職不得自爲政惟出納供
億之過而問焉其展布不異一有司而冗猥過之與
設官初制莫不侔矣而猶稱之曰方伯循資積自可
轉而開府列卿是其任在若重若輕之間而其能自
爲重而使人不得輕則在其人也志遠以癸丑冬入
蜀值左伯關獨肩藩政者逾年不量其力欲於出納
供億之外稍脩明其政以無負於綱紀一方之名實
心力殫矣而績效蔑如蓋材有所限而局有所域無
所短長之效固然矣蜀故沃壤奧區今公私彫劫之

狀殆不堪聞試問其故耗於兵腹於權靡於榷梓之
供與 天潢食積之衍人人能言之而不知其若於
綱目之陳賦役之紊銅墨奪其一刀筆奪其一里正
市魁奪其一稊亦奪其一儉亦奪其一如是者猶日
月割削不知其盡也 祖宗以百戰有天下樹屏牧
人而輕重覆之今方伯雖處於積輕之勢於人牧我
爲長可無念哉以察吏安民匪異人任如彼以瘡痍我
以木痺彼以谿壑我以傳舍其愈幾何我之自輕人
誰能重之曰之曰錢穀之司不也足乎布政使題名

石已滿余方改造適左伯侯公至余將以入
賀行具以前語諭侯公公曰書予之言以思前哲告
來者遂書之

遵義兵巡道題名記

孫學易

掌考播州爲非鬼分野屬牂牁故地前代建置沿革
不一唐末始濬於夷宋元以後間亦廢置戎
明因之更署宣慰使轄屬川東自逆酋煽亂致塵
王師削平之郡縣其地抑何鄭重乃封疆所屆延袤
千餘里強半褒谷隩區厥田上中賦可三萬緡鎗其

他隸在黔省不與焉若是則郡縣足矣何以監司爲哉是不然播昔爲蠻夷君長今一旦受漢官要束妖氛初靖及側未安苗穴比隣剽掠足慮堂奧之憂門庭之寇庸詎可晏然已乎又四方亡命托足斯土往往椎埋爲姦最爾郡治越在省會東南邊徼孤懸一隅民癯瘠吏治惰窳豈台使者耳目所能周咨至於戍卒強弱糧糗贏誦一切前練諸時非監司之任而誰此其責亦綦鉅矣當事者持籌而計特疏於朝事設一兵巡道弭節郡內所爲桑土綢繆慮至悲

也恭親

初書所載嚴城守謹斥堠與夫積餽募兵鋤強禦暴興利除害悉責成於監司赫赫

王言不啻諄切可畏哉其誰敢溺職以自干

功令而議者迺謂兵可省不知去而官兵必藉土著此輩狼子野心嗚張豕突彼重則我輕是我以柄倒持也又或謂餽可自給不知田賦所入止有此數無兩粟點金之術而妄議節縮卒然呼庚癸是我以肘腋養亂也倒柄外患養亂內憂重創之而輕守之以

微倖於尾注之全毋乃以封疆戲乎矧不佞以茫昧
承乏抑又難矣頃雖藉手郡邑長令經畫少稍不急
以佐公帑僅得三千餘雖視額饒十不當一而予技
亦已窮所未逮者不無俟後之君子抑又聞之技擊
不足當節制則教士固難於養士已不佞素已議餉
毋亦難是行右轅左前茅後勁置八陣三才爲營率
然諸陣而親鼓之裨軍令備明內安外攘而無五大
五細是愚或足術耳不然日敝敝焉振刷神采而猥
欲威伸邊陲也不重失

上命監司意哉先是播平迄今駐鎮凡九人爵里姓氏概未有識茲蒐而被之貞珉併爲之記以書於上方用備督學使杜君考覽而收之蜀乘語曰前事不人後事之師也舉也儻以彰往勸來則僭踰之辜不佞其何辭矣